

UMP Tuan Rumah Debat Perdana Integriti



Debat Perdana Integriti Piala Perdana Menteri 2012 anjuran Institut Integriti Malaysia (IIM), Universiti Malaysia Pahang (UMP) dan Majlis Debat Universiti-Universiti Malaysia (MADUM) yang berlangsung selama empat hari sejak 24 Februari lalu melabuhkan tirai dengan suasana yang cukup meriah di UMP.

Pertandingan disertai 19 buah Institusi Pengajian Tinggi Awam (IPTA), 10 buah Institusi Pengajian Tinggi Swasta (IPTS) dan dua buah Institusi Pendidikan Guru (IPG) menyaksikan Universiti Kebangsaan Malaysia (UKM) dinobatkan juara mengalahkan Universiti Sultan Zainal Abidin (UnisZA) dalam pertandingan akhir yang berlangsung di Kompleks Sukan UMP pada 28 Februari yang lalu.

Pasukan UKM yang bertindak sebagai pencadang dalam membentangkan usul bertajuk "Pembinaan Integriti Mahasiswa Terencat" ini dibarisi Abdul Hakim Md Yusoff, Mohamed Affendy Hasni, Mohd. Yusry Hydrus dan Najah Izzati Suleman.

Mereka berjaya membawa pulang wang tunai enam ribu ringgit, sebuah komputer riba setiap seorang, piala pusingan Perdana Menteri, piala iringan dan sijil penyertaan.

Selain itu, Mohd. Yusry turut menang wang tunai seribu ringgit apabila dinobatkan pendebat terbaik keseluruhan.

Manakala pasukan UnisZA dibarisi Wan Zainuddin Ali Aspar, Mohd Adib Aiman Abdul Shahar, Nurul Ain Mat Rahim dan Mohd Nadzely Abdul Karim yang bertindak sebagai pembangkang menjadi Naib Johan dalam pertandingan kali ini dengan membawa wang tunai empat ribu ringgit, piala iringan dan sijil penyertaan.

Pendebat UMP yang diwakili Siti Aisyah Mustapha, Qusyairi Hashim, Qamaruddin Mohd Fauzi dan Wu Daniel berjaya melayakkan diri ke pusingan suku akhir namun terpaksa akur apabila tewas dengan pasukan UnisZA.

Menurut Naib Canselor UMP, Dato' Dr. Daing Nasir Ibrahim berkata, menepati tema

debat, Integriti Menjana Transformasi ianya mengisyaratkan perlunya golongan pembuat dan pelaksana dasar serta rakyat Malaysia untuk meletakkan nilai integriti pada koordinat yang sepatutnya bagi menjayakan agenda tranformasi negara.

Ianya juga merupakan komitmen tinggi kerajaan untuk melaksanakan Program Tranformasi Kerajaan (GTP), Program Tranformasi Ekonomi (ETP) dan Transformasi Politik perlu disahut oleh para penggerak jentera pentadbiran dan rakyat secara keseluruhannya bagi mencapai Wawasan 2020 dalam tempoh lapan tahun dari sekarang.

"Penguatkuasaan undang-undang semata-mata tidak akan menyelesaikan masalah integriti dan ketirisan. Paling utama ialah penghayatan dan kesedaran yang mendalam pada setiap peringkat masyarakat untuk mengangkat integriti sebagai amalan dan budaya bersama," kata beliau yang hadir merasmikan majlis penutup dan penyampaian hadiah kepada semua pemenang.

Malah, katanya pentas debat tidak sekadar mampu menggilap mahasiswa yang petah berkata-kata, tetapi turut melahirkan mahasiswa mampu menghayati tertib dan adab bicara seorang negarawan yang unggul nilai kesajarannya sekiranya semangat ini dapat ditekuni oleh pengelola dan peserta sesuatu perdebatan.

Beliau yakin melalui usul-usul yang telah diperdebatkan, para peserta dapat menekuni isu-isu berkaitan integriti daripada pelbagai dimensi dan mengharapkan idea dan cadangan yang telah dikemukakan mereka mempunyai nilai signifikan untuk diketengahkan pula dalam forum yang lebih berautoriti.

Sementara itu, menurut Presiden IIM, Datuk Dr. Mohd. Tap Salleh, penganjuran pertandingan ini dapat meningkatkan budaya integriti di kalangan pelajar IPT.

Katanya, beliau pada masa ini terdedah dengan pelbagai masalah terutamanya berkaitan Intellektual (IQ) dan Emosi (EQ).

Malah, faktor utama dalam EQ meninggalkan kesan yang mendalam termasuk berkaitan kesihatan dan sosial.

Hadir sama menyaksikan pertandingan akhir ialah Timbalan Naib Canselor (Hal Ehwah Pelajar & Alumni), UKM yang juga Timbalan Pengerusi MADUM, Profesor Ir. Dr. Othman A. Karim dan Penolong Naib Canselor (Hal Ehwah Pelajar & Alumni), Profesor Dr. Yuserrie Zainudin.

